
Broj:01-04-199/19

Sarajevo: 6.7.2019. godine

Na osnovu člana 92. stav 1. alineja 1, 3 i 8 Statuta Socijaldemokratske partije Bosne i Hercegovine (u daljem tekstu: SDP BiH), Predsjednik SDP BiH d o n o s i,

O D L U K U

o raspuštanju organa KO SDP BiH Tuzlanskog kantona i imenovanju povjereništva

I

Zbog donošenja odluke koja je u direktnoj suprotnosti sa odlukama donesenim od strane Glavnog odbora SDP BiH, koje su potvrđene od strane Kongresa SDP BiH, čime su djelovali suprotno osnovnim političkim i programskim ciljevima SDP BiH, te protivno Statutu SDP BiH, a kako bi se spriječilo nanošenje još veće političke štete po SDP i kako bi osigurali jedinstvo djelovanja svih organa i organizacija raspuštaju se organi Kantonalne organizacije SDP BiH Tuzlanskog kantona: Kantonalni odbor, Nadzorni odbor, Predsjedništvo i Predsjednik KO.

II

Nakon raspuštanja organa Kantonalne organizacije u cilju osiguravanja mjera za funkcionisanje organizacije imenujem povjereništvo KO SDP BiH Tuzlanskog kantona u sastavu:

- Hadžić Dževad, Kalesija, predsjednik kluba zastupnika SDP u Skupštini TK, šef povjereništva
- Dervišagić Edis, Gradačac, gradonačelnik opštine, član
- Helić Nusret, Gračanica, gradonačelnik opštine, član
- Ilić Slađan, Tuzla, dopredsjedavajući u Skupštini TK, član
- Hodžić Amila, Živinice, zastupnica u Skupštini TK, član
- Sejdinović Nisvet, Srebrenik, predsjednik gradske organizacije, član
- Čufer Zlatan, Lukavac, potpredsjednik Opštinske organizacije, član
- Karić Alen, Doboj Istok, zastupnik u Skupštini TK, član

- Todorović Nenad, Banovići, potpredsjednik KO, član
- Divković Ivo Tuzla, član Glavnog odbora SDP BiH, član
- Hasić Mujo, Gračanica, zastupnik u Parlamentu Federacije BiH, član
- Avdić Refik, Kladanj, član predsjedništva opštinske organizacije, član
- Selimović Admir, Sapna, član
- Hodžić Hajrudin, Teočak, predsjednik opštinske organizacije, član.

III

Zadatak povjereništva je da osigura funkcionisanje organizacije u okviru političkih i programskih opredjeljenja SDP BiH, provođenju odluka Kongresa i Glavnog odbora SDP BiH, te da u skladu sa Statutom SDP BiH na osnovu pravilnika kojeg utvrdi Glavni odbor u roku od tri (3) mjeseca osigura provođenje redovnih izbora za organe Kantonalne, te gradskih i opštinskih organizacija sa područja Tuzlanskog kantona.

IV

Kao Koordinatora za Tuzlanski kanton u ime Socijaldemokratske partije Bosne i Hercegovine za pomoć, koordinaciju i direktnu komunikaciju sa povjereništvom imenujem Bećirović Denisa.

V

Ova Odluka stupa na snagu danom donošenja, a na konstituirajućoj sjednici Glavnog odbora Socijaldemokratske partije Bosne i Hercegovine, 20. jula 2019. godine, treba biti potvrđena od Glavnog odbora SDP BiH.

VI

Imenovano povjereništvo nakon dostavljanja odluke preuzima vođenje organizacije u skladu sa zadacima i ovlastima iz odluke. Ukoliko Glavni odbor potvrdi odluku članovi raspuštenih organa će imati pravo žalbe Statutarnom odboru SDP BiH.

OBRAZLOŽENJE

Kantonalni odbor SDP BiH TK na svojoj sjednici 01.jula 2019.godine, donio je zaključak da su “u skladu sa svojim kapacitetom otpočeli razgovore oko uspostave vlasti na TK sa partnerima”, te da će učiniti sve kako bi se vlada u TK uspostavila u što kraćem vremenskom periodu.

Odmah nakon toga imali smo priliku vidjeti kako su otpočeli razgovori sa SDA čime su nedvosmisleno prekršene odluke i zaključci Glavnog odbora SDP BiH potvrđeni usvajanjem izvještaja o radu tog organa SDP BiH od strane delegata Kongresa.

Izvod iz zapisnika sa sjednice koji je dostavljen na traženje rukovodstva SDP BiH jasno potvrđuje da je intencija aktuelnog rukovodstva Kantonalne organizacije i malog dijela kluba zastupnika da prekrše odluke organa SDP BiH koji jedini prema odredbama Statuta SDP ima nadležnost da donese odluku o ulasku u koalicije.

Usprkos svim jasnim činjenicama nisam želio žuriti s bilo kakvim sankcijama očekujući da će ljudi u rukovodstvu KO shvatiti težinu odluke koju su donijeli, te da će odustati od njene realizacije. Umjesto toga svjedoci smo da se povećava medijski pritisak, da se produbljuje jaz unutar organizacije narušava jedinstvo na način da se međusobno sukobljavaju organizacije, da se vrši pritisak na pojedine zastupnice i zastupnike kako bi ih se privolilo da promijene svoju odluku.

Smatram kako su KO i njegovo rukovodstvo donošenjem zaključaka oko formiranja vlasti u TK, a posebno otvaranjem pregovora sa SDA, potpuno svjesno, grubo prekršili odluke i zaključke Glavnog odbora SDP BiH donesene na 17. Sjednici GO SDP BiH održanoj 9.februara 2019. godine, te na 18. sjednici GO SDP BiH održanoj 19.marta 2019. godine koje je prihvatajući izvještaj o njegovom radu potvrdio i 7. Redovni Kongres kao najviši organ Socijaldemokratske partije Bosne i Hercegovine.

Članovi rukovodstva organizacije su svjesni kako je Statutom SDP BiH propisano da Glavni odbor SDP BiH jedini ima nadležnost da donosi odluku o uspostavljanju koalicija sa drugim strankama, zbog čega su zaključci KO SDP TK izvan njihove nadležnosti, pa samim tim i ne mogu proizvesti bilo kakvo dejstvo prema vani, ali ni unutra prema članicama i članovima organizacija iz TK koji ih ne budu poštovali.

Kako je Statutom SDP BiH, pored ostalog, u nadležnosti Predsjednika SDP BiH utvrđena obaveza da se stara o provođenju odluka Kongresa, Glavnog odbora i Predsjedništva SDP BiH, da osigurava jedinstvo djelovanja organa i organizacija SDP BiH, te da ostvaruje komunikaciju sa predsjednicima teritorijalnih organizacija radi dogovaranja o mjerama efikasnijeg provođenja politika SDP BiH.

U isto vrijeme je propisano da Predsjednik u hitnim slučajevima može donijeti odluke iz domena predstavljanja i zastupanja SDP BiH koje se temelje na odlukama i stavovima organa SDP BiH.

Imajući u vidu da sam trenutno jedini organ na nivou SDP BiH u punoj funkciji, s jasno utvrđenim pravima i obavezama, svjestan činjenice da ovakvim djelovanjem rukovodstvo KO koje se ponaša kao autonomni potpuno otuđeni dio organizacije, na taj način nanosi sve veću političku štetu po SDP BiH,

svjesno krši odluke viših organa, narušava jedinstvo djelovanja u organizacijama i između pojedinih organizacija, iskoristio sam svoje ovlasti i donio odluku o raspuštanju organa KO SDP TK.

Dužan sam donijeti i mjere koje će osigurati nesmetano funkcionisanje organizacije. Zato sam donio odluku o imenovanju povjereništva u sastavu i sa jasno definiranim zadacima utvrđenim u dispozitivu ove odluke.

Kao koordinator za rad povjereništva za TK i SDP BiH imenovan je Denis Bećirović što bi trebalo osigurati potpunu koordinaciju, pomoć i saradnju na ostvarivanju postavljenih zadataka.

Smatram da bi nastavak ovakvog djelovanja KO samo još više dodatno zbunjivao javnost, naše članove, simpatizere i glasače, što bi nanosilo političku štetu SDP zbog čega sam donio odluke kao u dispozitivu koja stupa na snagu danom donošenja.

Imenovano povjereništvo odmah po dostavljanju odluke preuzima vođenje organizacije kako bi se spriječilo daljnje nanošenje političke štete.

Odluku koju sam donio, zbog hitnosti na osnovu ovlaštenja iz člana 92. stav 1 alineja 8, treba potvrditi Glavni odbor SDP BiH na svojoj prvoj sjednici.



Predsjednik SDP BiH

Nermin Nikšić